



*Ratio præcipua nostræ vitæ consistit in  
motu sanguinis circulari.*

**M**acte animo, si forte tuos agnoscere gestis  
Ortus, & vitæ primordia parva recentis,  
Finge hominis speciem tantum nudamq; figuram  
Et veri simulacra viri, cui crura, lacerti,  
Et passim multo concrevit tendine corpus.  
Attollit coelis eadem ora; haut dispare vultus  
Majestate nitet, nervis aptatur, eosdem  
Natura indulgens oculis afflavit honores.

Hanc statuam Divorum immunis materiai  
Stat circum mirata cohors, cunabula magni  
Suspiciens operis tantum non æmula sortis  
Angelicæ; quid tanta velint incepta Tonantis,  
Quidve sacrum molitur opus par omnibus Astris  
Et solo Michaële minus, nunc omnia quærunt  
Et trepidant. Tali se gestit imagine coelum  
Cernier & parvo quamvis confidere fano.

Verum illi imperfectus honos, vitæq; recentis  
Parva rudimenta & sortis vix umbra futuræ.  
Ignea vis illi nondum, nec purior aura  
Aut sensum ciet aut motum delapsa supernæ.  
Quin segnis jacet, & magno concreta gelu stat  
Machina iners, nullâ pollens virtute cadaver.

At tu sacra mihi semper multumq; colenda  
Vita veni; quæ te tandem connubia lætam  
Ediderint! seu Divinæ felicior auræ  
Pars mavis audire, novos vel mobilis humor  
Cum calidioritè socians accenderit ignes,  
Sive oreris, cum post rixas & jurgia sedat  
Fracta quies, elementa & amico foedere jungit.

Quin potius nobis lævâ de parte mamillæ  
Inprimis saliunt parvi primordia puncti  
Quod toto miris succo fermenta modis cît:  
Atq; ubi canales finxit parvosq; meatus,  
Proluit irriguum centeno gurgite corpus.  
Hunc ubi ferventem croceo cor murice tinxit  
Mittit aorta foras & inundat sanguine venas.

Sanguen ei nomen; Talis vix purpura *Cyrum*  
Vestivit, sericq; nives violavit *Eoi*.  
Quod si semina prima cupis partésq; minutas

Noscere tam sacri laticis, sunt quatuor illi  
*Nomina*: nimirum vel inest cœlestior aura  
Spiritus hinc cerebro sensum motumq; ministrans,  
Vel nutricandis (quæ sensim deperiêre)  
Partibus inservit paulatim roscidus humor  
Sulphure repletus pingui, tum Lympha meatus  
Lapsa rigat, diros pars terrea temperat ignes.

Sic natura fluit, tali se læta tenore  
Se'cla virum tacito gaudent producere filo.  
Usq; agitur sanguis; proprios haut sanctius *Astra*  
Æternum servant cursus superiq; perennant  
Per coelos ignes. Sin forsan purior aura  
Exhalet, tum membra rigent molésq; fatiscit  
Et propiora nivent inter sua funera ocelli;  
Tunc omnis cessare vigor, pronumq; labascit  
Sanctum animal; operis magni non parva ruina  
Atq; ipso in cinere augusti vestigia templi.

*Distincta visio fit tantum per Axem  
opticum.*

**E**N! quæ fidereis se frons attollit ocellis,  
Alterius mundi lumina bina vides.  
Interiùs gemino contingunt caule cerebrum  
Et transfert unam nervus uterque plagam.  
Illac cunctarum irrepunt Phantasmata rerum  
Et quantas cœli machina jactat opes.  
Quid pulchrum atq; nitens, quali se lumine vestit  
Ætheriæ gradiens sol per amœna plagæ;  
Naturæ risus, variæ miracula lucis  
Hac unâ subeunt cuncta stupenda viâ.  
At tu nè credas omni de parte videndas  
Res oculum temerè mittier usque tuum.  
Est quædam quæ de medio se pôrgit ocello  
Visivique axis linea nomen habet;  
Quæ producta foras & rem protensa per ipsam  
Gestiat emissas continuare vias.  
Undique conversus coelum hac comprehendit ocellus,  
Quæ verum jactat pingere sola situm.  
Cætera sunt aliò temerè dilapsa; refringens  
Confestim violat densior unda jubar.